

古詩錄

民國十五年季冬重印

掃葉山房發行

四

宛鄰書屋古詩錄卷十

陽湖張琦

梁詩三十家九十一首歌辭十三首

張率白紵歌七章

妙聲屢唱輕體飛。流津染面散芳菲。俱動齊息不相違。令彼嘉客憺忘歸。
時久翫夜明星稀。

秋風鳴條露垂葉。空閨光盡坐愁妾。獨向長夜淚承睫。山高水深路難涉。
望君光景何時接。

遙夜方遠時既寒。秋風蕭瑟白露團。佳期不待歲欲闌。念此遲暮獨無歡。
鳴弦流管增長歎。

夜寒湛湛夜未央。華燈空爛月懸光。從風衣起發芬香。為君起舞幸不忘。
列坐華筵紛羽爵。清曲未終月將落。歌舞及時酒常酌。無令朝露坐銷鑠。
愁來夜遲猶歎息。撫枕思君終反側。金翠釵環稍不飾。霧縠流黃不能織。
但坐空閨思何極。欲以短書寄飛翼。

遙夜忘寐起長歎。但望雲中雙飛翰。明月入牖風吹幔。終夜悠悠坐中旦。

誰能知我心中亂終然有懷歲方晏。

柳惲江南曲

汀州採白蘋。日暖江南春。洞庭有歸客。瀟湘逢故人。故人何不返。春花復應晚。不道新知樂。祇言行路遠。

柳惲擣衣詩五首

孤衾引思緒。獨枕愴憂端。深庭秋草綠。高門白露寒。思君起清夜。促柱奏幽蘭。不怨飛蓬苦。徒傷蕙草殘。

行役滯風波。遊人淹不歸。亭皋木葉下。隴首秋雲飛。寒園夕鳥集。思牖草蟲悲。嗟矣當春服。安見禦冬衣。

鶴鳴勞永歎。採菜傷時暮。念君方遠遊。賤妾理紈素。秋風吹綠潭。明月懸高樹。佳人飾淨容。招攜從所務。

步櫺杳不極。離堂肅已扃。軒高夕杵散。氣爽夜砧鳴。瑤華隨步響。幽蘭逐袂生。踟躕理金翠。容與納宵清。

泛豔迴烟綠。淵旋龜鶴文。淒淒合歡袖。冉冉蘭麝芬。不怨杼軸苦。所悲千

里分。垂泣送行李。傾首遲歸雲。

庾肩吾賦得有所思

佳期竟不歸。春日坐芳菲。拂匣看離鏡。開箱見別衣。井梧生未合。宮槐卷復稀。不及銜泥燕。從來相逐飛。

庾肩吾九日侍宴樂遊苑應令

轍迹光周頌。巡遊盛夏功。鈞陳萬騎轉。閶闔九關通。秋暉逐行漏。朔氣繞相風。獻壽重陽節。迴鑒上苑中。疏山開輦道。閤樹出離宮。玉醴吹巖菊。銀牀落井桐。御禁寒更紫。仙桃秋轉紅。飲羽山西射。浮雲冀北驄。塵飛金埒滿。葉破柳條空。騰猿疑矯箭。驚雁避虛弓。彫材濫杞梓。花綬接鸛鴻。婉之天庭藻。徒參文雅雄。

庾肩吾從皇太子出元圃應令

春光起麗譙。屣步陟山椒。閣影臨飛蓋。鸞鳴入洞簫。水還登故渚。樹長蔭前橋。綠荷生綺葉。丹藤上細苗。顧循慙振藻。何用擬瓊瑤。

庾肩吾尋周處士宏讓

試逐赤松遊。披林對一邱。繁紅大谷晚。桂白小山秋。石鏡菱花發。桐門琴曲愁。泉飛疑度雨。雲積似重樓。王孫若不去。山中定可留。

庾肩吾過建章故臺

魯國觀遺殿。韓城想舊臺。仲宣原隰滿。子建悲風來。夏蓮猶反植。秋窗尚左開。圖雲仍溜雨。畫水即生苔。及君歡四望。知余念七哀。

庾肩吾詠長信宮中草

委翠似知節。含芳如有情。全由履迹少。併欲上階生。

庾肩吾詠美人

絳樹及西施。俱是好容儀。非關能結束。本是細腰肢。鏡前難並照。相將映淥池。看妝畏水動。斂袖避風吹。轉手齊裾亂。橫簪壓鬢垂。曲中人未取。誰堪白日移。不分他相識。惟聽使君知。

吳均秦王卷衣

咸陽春草芳。秦帝卷衣裳。玉檢茱萸匣。金泥蘇合香。初芳熏複帳。餘輝耀玉牀。當須晏朝罷。持此贈華陽。

吳均采蓮曲

錦帶雜花鈿。羅衣垂綠川。問子今何去。出采江南蓮。遼西三千里。欲寄無因緣。願君早旋返。及此荷花鮮。

吳均雍臺

雍臺十二樓。樓樓鬱相望。隴西飛狐口。白日盡無光。

吳均行路難二首

君不見西陵田。從橫十字成陌阡。君不見東郊道。荒涼蕪沒起寒烟。盡是昔年帝王處。歌姬舞女達天曙。今日翩妍少年子。不知華盛落前去。吐心吐氣許他人。今日迴惑生猶豫。山中桂樹自有枝。心中方寸自相知。何言歲月忽若馳。君之情意與我離。還君玳瑁金雀釵。不忍見此使心危。

君不見長安客舍門。倡家少女名桃根。貧窮夜紡無燈燭。何言一朝奉至尊。至尊離宮百餘處。千門萬戶不知曙。惟聞啞啞城上烏。玉闌金井牽轡轡。丹梁翠柱飛流蘇。香薪桂火炊雕胡。當年翻覆無常定。薄命為女何必麋。

吳均別王謙

巖光不逐世。流轉任飛蓬。欲還天台嶺。不狎甘泉宮。離歌玉弦絕。別酒金
卮空。儻道故人念。僕在東山東。

吳均春詠

春從何處來。拂水復驚梅。雲障青鎖闥。風吹承露臺。美人隔千里。羅幃閉
不開。無由得共語。空對相思柸。

何遜銅雀妓

秋風木葉落。蕭瑟管絃清。望陵歌對酒。向帳舞空城。寂寂檐宇曠。飄飄帷
幔輕。曲終相顧起。日暮松柏聲。

何遜望廨前水竹答崔錄事

蕭蕭叢竹映。澹澹平湖淨。葉倒連漪文。水漾檀欒影。相思不會面。相望空
延頸。遠天去浮雲。長墟斜落景。幽疴與歲積。賞心隨事屏。鄉念一逕迴。白
髮生俄頃。

何遜酬范記室雲

林密戶稍陰。草滋階欲暗。風光蕊上輕。日色花中亂。相思不獨懽。佇立空
為歎。清談莫共理。繁文徒可玩。高唱子自輕。繼音予可憚。

何遜夕望江橋示蕭諮議楊建康江主簿

夕鳥已西度。殘霞亦半消。風聲動密竹。水影漾長橋。旅人多憂思。寒江復
寂寥。爾情深鞏洛。予念返漁樵。何因適歸願。分路一揚鏹。

何遜入西塞示南府同僚

露清曉風冷。天曙江光爽。薄雲巖際出。初月波中上。黯黯連嶂陰。騷騷急
沫響。迴植急礙浪。羣飛爭戲廣。伊余本羈客。重睽復心賞。望鄉雖一路。懷
歸成二想。在昔愛名山。自知惟獨往。情遊乃落魄。得性隨怡養。年事以蹉
跎。生平任浩蕩。方還讓夷路。誰知羨魚網。

何遜贈諸舊遊

弱操不能植。薄伎竟無依。淺智終已矣。令名安可希。擾擾從役倦。屑身
事微少。壯輕年月遲。暮惜光輝一。塗今未是。萬緒昨如非。新知雖已樂。舊
愛盡睽違。望鄉空引領。極目淚沾衣。旅客長憔悴。春物自芳菲。岸花臨水

發江燕遠檣飛。無由下征帆。獨與暮潮歸。

何遜秋夕仰贈從兄寘南

堦蕙漸翻葉。池蓮稍罷花。高樹北風響。空庭秋月華。寸心懷是夜。寂寂漏方賒。撫弦乏歡娛。臨觴獨歎嗟。悽愴戶涼入。徘徊欄影斜。無為淹戚里。見就還田家。

何遜送韋司馬別

送別臨曲渚。征人幕前侶。離言雖欲繁。離思終無緒。憫憫分手畢。蕭蕭行帆舉。舉帆越中流。望別上高樓。予起南枝怨。子結北風愁。灑灑山蔽日。洶洶浪隱舟。隱舟邈已遠。徘徊落日晚。歸衢並駕奔。別館空筵卷。想子斂眉去。知余銜淚返。銜淚心依依。薄暮行人稀。曖曖入塘港。蓬門已掩扉。簾中看月影。竹裏見螢飛。螢飛飛不息。獨愁空轉側。北窗倒長簾。南鄰夜聞織。棄置勿復陳。重陳長歎息。

何遜贈韋記室黯別

故人儻送別。停車一水東。去帆若不見。試望白雲中。促膝今何在。銜杯誰

復同水夜看初月。江晚沂歸風。無因生羽翰。千里暫排空。

何遜下方山

寒鳥樹間響。落星天際浮。繁霜白曉岸。苦霧黑晨流。鱗鱗逆去水。瀾瀾急還舟。望鄉行復立。瞻途近更修。誰能百里地。縈繞千端愁。

何遜學古贈邱永嘉征還

龍馬魚腸劍。躡蹠起風塵。結客蔥河返。喧動四鄰人。墟猶憶舊。覓巷復疑新。窺見應門出。遙識下機人。相悲淚欲下。離別方自陳。

何遜和蕭諮議岑離閨怨

曉河沒高棟。斜月半空庭。窗中度落葉。簾外隔飛螢。含悲下翠帳。掩泣閉金屏。昔期今未返。春草寒復青。思君無轉易。何異北辰星。

何遜嘲劉郎

房櫳滅夜火。窗戶映朝光。妖女寒帷去。躡蹠初下牀。雀釵橫曉鬢。蛾眉豔宿妝。稍聞玉釧遠。猶憐翠被香。寧知早朝客。羞池已雁行。

何遜詠照鏡

五
掃葉山房

朱簾旦初捲。綺機晨未織。玉匣開鑑影。寶臺靜臨飾。對影獨含笑。看花時轉側。聊為出繭眉。試染夭桃色。寶釵若可閒。金鈿畏相逼。蕩子行未歸。啼妝坐沾臆。

何遜學古

長安美少年。羽騎暮連翩。玉羈瑪瑙勒。金絡珊瑚鞭。陣雲橫塞起。赤日下城圓。追兵待都護。烽火望祁連。虎落夜方寢。魚麗曉復前。平生不可定。空信蒼浪天。

何遜臨行公車

擾擾排曙扉。鱗鱗驅早駕。禁門儼猶閉。嚴城方警夜。道勝多增榮。拙薄終難化。以茲畎澮質。重與滄溟舍。纜舟去濁河。揆景辭清灞。平生多意緒。懷抱皆徂謝。念此將何如。撫心獨悲咤。

何遜揚州法曹梅花盛開

兔園標物序。驚時最是梅。銜霜當路發。映雪擬寒開。枝橫卻月觀。花繞凌風臺。朝灑長門泣。夕駐臨邛杯。應知早飄落。故逐上春來。

何遜贈王左丞僧孺

欄外鶯啼罷。園裏日光斜。遊魚亂水葉。輕燕逐風花。長墟上寒靄。曉樹沒歸霞。九華暮已隱。抱鬱徒交加。

何遜敬酬王明府

星稀初可見。月出未成光。澄江照遠火。夕霞隱連樯。賤軀臨不測。玉體畏垂堂。念別已零淚。況乃思故鄉。

何遜日夕出富陽浦口和朗公

客心愁日暮。徙倚空望歸。山烟含樹色。江水映霞暉。獨鶴凌空逝。雙鳬出浪飛。故鄉千餘里。茲夕寒無衣。

何遜望新月示同羈

初宿長淮上。破鏡出雲明。今夕千餘里。雙蛾映水生的的與沙靜。濛濛逐波輕。望鄉皆下淚。非我獨傷情。

何遜閨怨二首

竹葉響南窗。月光照東壁。誰知夜獨覺。枕前雙淚滴。

閨閣行人斷。房櫳月影斜。誰能北窗下。獨對後園花。

何遜相送

客心已百念。孤遊重千里。江暗雨欲來。浪白風初起。

何遜相送聯句

高軒雖駐軫。餘日久無暉。以我辭鄉淚。沾君送別衣。

蕭子範望秋月

河漢東西陰。清光此夜出。八帳華珠被。斜庭照寶瑟。霜慘庭上蘭。風鳴簷下橘。獨見傷心者。孤燈坐幽室。

蕭子顯春閨思

金羈遊俠子。綺機離思妾。春度人不歸。望花盡成葉。

蕭子顯春別二首

翻鶯度燕雙比翼。楊柳千條共一色。但看陌上攜手歸。誰能對此空相憶。幽宮積草自芳菲。黃鳥著樹情相依。爭風競日常聞響。重花疊葉不通飛。當知此時動妾思。慙使羅袂拂君衣。

蕭子雲落日郡西齋望海山

漁舟暮出浦。漢女採蓮歸。夕雲向山合。水鳥望田飛。蟬鳴早秋至。蕙草無芳菲。故隱天山北。夢想日依依。

蕭鈞晚景遊泛懷友

龍門依御溝。鳳輶轉芳洲。雲峰初辨夏。麥氣早迎秋。山翠餘烟積。川平晚照收。浪隨文鷁轉。波逐彩鷺浮。風光轉未落。巖泉咽不流。一辭金谷苑。空想竹林遊。

王籍入若邪溪

艤艫何汎汎。空水共悠悠。陰霞生遠岫。陽景逐迴流。蟬噪林逾靜。鳥鳴山更幽。此地動歸念。長年悲倦遊。

王筠遊望

落日照紅妝。挾瑟當窗牖。寧復歌薜蘿。惟聞歎楊柳。結好在同心。離別由衆口。徒設露葵羹。誰酌蘭英酒。會日杳無期。薜華安得久。

劉孝綽銅雀妓

雀臺三五日。弦吹似佳期。沈復西陵晚。松風吹總帷。危絃斷復續。安心傷此時。誰言留客袂。還掩望陵悲。

劉孝綽夕逗繁昌浦

日夕江風靜。安波似未流。岸迴知舳轉。解纜覺船浮。暮烟生遠渚。夕鳥赴前洲。隔山聞戍鼓。傍浦喧棹謳。疑是辰陽宿。於此逗孤舟。

劉孝綽答何記室

游子倦飄蓬。瞻途杳未窮。晨征凌迸水。暮宿犯顛風。出洲分去燕。向浦逐歸鴻。蘭芽隱陳葉。荻苗抽故叢。忽憶園閒柳。猶傷江際楓。吾生棄武騎。高視獨辭雄。既殫孝王產。兼傾卓氏僮。罷籍睢陽園。謁建章宮。紛余似鑿枘。方圓殊未工。黑貂久自弊。黃金屢已空。去辭追楚穆。還耕偶漢馮。巧拙良為異。出處嗟莫同。若厭蘭臺右。見訪灞陵東。

劉孝綽古意

燕趙多佳麗。白日照紅妝。蕩子十年別。羅衣雙帶長。春樓怨難守。玉堦空自傷。復此歸飛燕。銜泥繞曲房。差池入綺幕。下上傍雕梁。故居猶可念。故

人安可忘相思昏望絕。宿昔夢容光。魂交忽在御。轉側定他鄉。徒然顧枕席。誰與同衣裳。空使蘭膏夜。炯炯對繁霜。

劉孝綽賦得照棋燭詩刻五分成

南皮絃吹罷。終夾且留賓。日下房櫳闇。華燭命佳人。側光全照局。迴花半隱身。不辭纖手倦。羞令夜向晨。

劉孝綽賦得遺所思

遺簪雕玳瑁。贈綺織鴛鴦。未若華滋樹。交枝蕩子房。別前秋已落。別後春更芳。所思不可寄。惟憐盈袖香。

劉孝綽望月有所思

秋月始纖纖。微光垂步簷。腫朧入牀簾。髣髴鑒窗簾。簾螢隱光息。簾蟲映光纖。玉羊東北上。金虎西南昞。長門隔清夜。高堂夢容色。如何當此時。懷清滿胸臆。

劉孝威郃縣遇見人織率爾寄

妖姬含怨情。織素起秋聲。度梭環玉動。踏躡佩珠鳴。經稀疑杼澀。緯斷恨

絲輕葡萄始欲罷。鴛鴦猶未成。雲棟共徘徊。紗窗相向開。窗疏眉語度。紗
輕眼笑來。籠籠隔淺紗。的的見妝華。鏤玉同心帶。雜寶連枝花。紅衫向後
結。金簪臨鬢斜。機頂挂流蘇。機傍垂結球。青絲引伏兔。黃金繞轆轤。豔彩
裙邊出。芳脂口上渝。百城交問遺。五馬共踟躕。直為閨中人。守故不要新。
夢啼漬花枕。覺淚濕羅巾。獨眠真是難。重衾猶覺寒。逾憶凝脂暖。彌想橫
陳歡。行驅金絡騎。歸就城南端。城南稍有期。想子亦勞思。羅衣久應罷。花
釵堪更治。新妝莫點黛。余還自畫眉。

劉孝先草堂寺尋無名法師

飛鏡點青天。橫照滿樓前。深林生夜冷。複閣上宵烟。葉動花中露。湍鳴閣
裏泉。竹風聲若雨。山蟲響似蟬。摘果仍荷藉。酌水用花傳。一卮聊自飲。萬
事且蕭然。

劉遵應令詠舞

倡女多豔色。入選盡華年。舉腕嫌衫重。迴腰覺態妍。情繞陽春吹。影逐相
思絃。履度開裙褊。鬟轉市花鈿。所愁餘曲罷。為欲在君前。